

# Ekwo-ozì, Jiemusu

## Deru

---

**1** <sup>1</sup> Mùbè Jiemusu, onye bụ onye-ozì Chileke; bụru onye-ozì Nnajiuphu, bụ Jizọsụ Kéreshi l'ekéle ọkpa-ipfu iri l'ẹbọ ono, dzuru mgboko ono ekele.

### Ekweta waa mmamiphe

<sup>2</sup> Ụnwunna mu; teke iphe-ọhutama g'ọ dūhabe byaru unu; unu wojeru iya dobe l'iphe, eeteru ẹswa. <sup>3</sup> Kẹle unu maru l'a -nọdu adale ekweta unu bẹ unu e-shi iya nwụta ọta-nshi. <sup>4</sup> Unu takpọepho nshi tafu iya l'ishi g'unu a-duebe ree; dzukwaphọ oke g'ọ tọ dū iphe, a-phọdu l'ẹhu unu. <sup>5</sup> Teke ọ dūru g'unu ha onye mmamiphe phọduru; g'onye ono sū Chileke g'ọ nū iya mmamiphe. Ọo-nū iya ya; eshinu Chileke bụ omeluko; tẹme ọ nọdu egudeje obu iphóró nū onyemonye iphe, ọ sūru g'ọ nū iya. <sup>6</sup> Ọle g'onye ono kwetakwa l'iphe oopfụ gẹ Chileke nū iya bẹ ọo-nū iya. G'ọ bọ bọkwa obu ẹbọ; l'onye obu abọ ẹbọ dūkwa g'akpara-mini eze-ẹnyimu, bụ pherephere anọduje enwunga iya. Ọ -kwaru iya shia ophuu; ọ kwaru iya shia ophuu. <sup>7</sup> G'ẹgube onye ono ta arịkwa l'ọ dūru iphe, ọo-nata l'ẹka Nnajiuphu; <sup>8</sup> kẹle onye abọ egomunggo ẹbọ ta apfushijekwa ike l'iphemiphe, oomekpọo ememe.

### Ụkpa waa enweru iphe

<sup>9</sup> Gẹ nwanna, daru ụkpa tua onwiya ẹpha lẹ Chileke kuliru iya eli. <sup>10</sup> Nokwaphọ g'onye ophu nweru iphe e-tu onwiya ẹpha l'ẹnya lwaru iya; kẹle oo-mechaa rifu g'okoko ẹswa; <sup>11</sup> kẹle ẹnyanwu awajẹ chishiahaa ike k'ophu oomeje ẹswa anwua lwaa; okoko iya erishihu; mma iya abvu. Noo g'onye nweru iphe a-gbabuhukwaphọ nwuhu l'ẹka oome iphe, dū iya mkpa.

### Ahuta ama waa enwu eye

<sup>12</sup> Ehu-utso be a goru nu onye taru nshi l'ohutama; kele teke a hucharu iya ama obu; ophu o daduru be ee-kpube iya okpu-eze, bu iya bu ndzu; buru obunggo, Chileke suru le ya e-bu ndu yeru iya obu. <sup>13</sup> Oo ya bu; onye aahu ama g'o mee ejo-iphe; o -wata iya agugu; g'o to sukwa l'oo Chileke enwu iya eye g'o mee ya. Kele o to dukwa onye Chileke enwu eye g'o mee ejo-iphe; ophu o dukwa onye enwu Chileke eye g'o mee ejo-iphe. <sup>14</sup> Oo eme ejo-iphe, agu nemadzu be edetaje iya nu; l'o nmalahu iya. <sup>15</sup> Oo ya bu; teke egu ejo-iphe tsutaru ime; l'onwua iphe-eji; iphe-eji kagheepho; l'onwua anwuhu.

<sup>16</sup> Unwunna mu, mu yeru obu; unu te etsoswekwa uzo. <sup>17</sup> Iphe, aanu anunu, du ree waa iphe-oma, adudu aka ntucha du iya shikota l'imigwe. O shi l'eka Nna ke iphoro imigwe, bu iya bu Nna ophu te echibuhujedu g'nyanwu abujeru o -chibuhu; ochi agbaahaa-a. <sup>18</sup> O turu obu iya onyo gude okpobe-opfu ono nwua anyi; g'anyi du g'akpuru iphe-mbu l'iphemiphe, o meru ememe.

### Anuma emee

<sup>19</sup> Unwunna mu, mu yeru obu; iphe, unu a-maru bu owa-a: g'onnyemo-nye bukwaru onye angabeje nchi l'iphe, eepfu temanu ooyee ya onu; buru onye ehu te eghujedu egu egwegwa; <sup>20</sup> kele iphe, eeme l'ehu-eghu taa bukwaru iphe, pfuru oto l'iphu Chileke. <sup>21</sup> Oo ya bu; unu tofu onwunu iphe, bukpuo umere, l'eshi ishi; waa iphe, bukpuo iphe-ashi; jia obu oyi; nata opfu ono, a kuru l'ime okpoma unu ono, bu iya l'a-du ike dzoo unu ono.

<sup>22</sup> Ole-a; unu bukwaru ndu eme opfu ono ememe. Unu ta abukwaru ndu anu iya anunu kpurumu; kele ono bukwa eme onwunu eswe. <sup>23</sup> Onye anupho opfu ono anunu; ophu oomedu iya ememe yeru nwoke, ele g'iphu gbaru iya l'onyo. <sup>24</sup> Mbụ onye lechaekwadurupho enya l'onyo bya atugba bya azohaehukwapho g'iphu gbaru iya. <sup>25</sup> Obenu onye enyoje ekemu ono, adudu aka ntucha du iya; mbu ekemu, emeje g'e nweru onwonye ono; o -duru onye phuberu iya iphu; ophu o budu onuma-ozohaa; o -buru onye emeje iya ememe; onye ono be ee-gude iphe, oome meeru eze-iphe-oma.

<sup>26</sup> Onye dobesu le ya bu onye ke Chileke lebe abu loosedeye ire iya eme onwiya eswe. Onye ono be eme ke Chileke nkiya bu ke mmanu. <sup>27</sup> Abu onye ke Chileke ophu Chileke, bu Nna kweru l'o bu okpobe iya bya aburu ophu ntucha adudu ono be bu akwo unwoabee le mkpa, duru phe nu; waa eyeru unwanyi, ji phe anohedu aka; waa ewofu aka le mkparwu ke mgboko-a.

### Anma okwa abo nemadzu ebo

**2** <sup>1</sup> Unwunna mu; g'unube ndu kweru ke Nnajiuphu anyi, bu Jizosu Kereshi-a; mbu Nnaji akpabiri; unu ta abojekwa nemadzu ebo. <sup>2</sup> Kele-a;

o -būru l'onye nweru iphe gbacharu mgbuguru bya akwaa onwiya yegele bataru l'ulo-ndzukọ unu; onye ukpa -yee nwankiriba iphe batakwapho; <sup>3</sup>teke unu kwaberu onye pho, kwaru akwapho ubvu su iya: "Bya asuga-be onwongu l'okposhi-echi-a" bya asu onye ukpa pho: "Pfuru l'eka ono" ozoo: "Bya anodu l'ali l'eka-a no-kube mu"; <sup>4</sup>?to budu nemadzu be unu abo ebo egube ono; teme unu gude ejo egomunggo ekpe ikpe?

<sup>5</sup>Unu ngabekpodapho nchi; unwunna mu, mu yeru obu. ?To budu ndu ukpa le mgboko-a be Chileke hotaru g'ephe buru ndu shi lekmeta, ephe kwetaru nweru iphe l'iphu Chileke; bukwarupho ndu e-nweru eka o bu eze, bu iphe, o suru le ya a-nu ndu yeru iya obu-a. <sup>6</sup>Unu gbenu meru iphe-iphere kpua ndu ukpa ?Tobudu ndu nweru iphe be l'akpaje unu ehua? ?To budu phe be l'akpujeru unu je edobe l'ulo ndu-ikpe-a? ??Tobudu phe anoduje epfubiyi eguru epha ono, unu aza ono epfubiyi-a?

<sup>8</sup>Unu -nodu emewaa eze ekemu ono be unu emewaa ree, bu iya bu eze ekemu, no lekwo Opfu Chileke, suru: "G'i yee nemadzu ibe ngu obu g'i yeru onwongu." <sup>9</sup>Obenu le-a; unu -nodu aboje nemadzu ebo be unu emekwa iphe-eji; teme ekemu nodu anmakwapho unu ikpe, bu iphe, gbaru onye emebiyi ekemu. <sup>10</sup>Kele onye meebekotaru iphe, ekemu pfuru g'o ha; mephodo nanu be ikpe nmakwaru l'o mebyikotaru iya g'o ha. <sup>11</sup>Kele o bukwapo onye suru g'i ti rishi ogori suru g'i ti gbushi ochi. O -buru li ti ridu ogori; i nodu egbu ochi; i buakwaa onye emebiyi ekemu. <sup>12</sup>Oo ya bu; unu pfuje; teme unu emejekwapho ge ndu ee-gude ekemu ono, emeje g'e nweru onwonye ono kpee ikpe. <sup>13</sup>Kele onye ta aphuduru onye ozo obu-imemini be a taa phukwarupho obu-imemini me e -kpeje ikpe. Obu-imemini atujeru okoo kpua ikpe!

### Ekmeta yeke iphe, eeme ememe

<sup>14</sup>Unwunna mu; ?denu urwu, du le nemadzu suru le ya nweru ekmeta; ophu oogoshidu iya l'umere? Egube ekmeta ono ?oo-du ike dzoo ya? <sup>15</sup>Teke o bu l'o duru nwanna ke nwoke; ozoo ke nwanyi, gbagbuwa oto; teme ophu o humajedu nri ria; <sup>16</sup>onye lanu g'unu ha su iya: "Tokwa ehua! Laa je anyaru oku; g'epho ji ngu" lebe abu l'o nuru iya iphe, bu mkpa ehua iya; ?denu urwu, du legube iphe ono? <sup>17</sup>Noo g'ekmeta kpoloko e te goshiduru l'iphe, eeme ememe bu iphe, nwuhuru anwuhu.

<sup>18</sup>Obenu la su mu: "Gubedua nweru ekmeta; mbedua nodu ejekwanu ozi." O du ree; goshiekwa mu ekmeta ngu me ii -jedu ozi, du iya nu. Mbedua-a egudekwanu ozi, mu eje goshi ngu ekmeta mu. <sup>19</sup>I kweru le Chileke bu Chileke lanu; i meru ree. Ono bukwapo g'obvu kwegbaaru gude iya anmagbaa pyaapyaapya. <sup>20</sup>Ole iphe, ii-maru gube onye mmanu ono bu lekmeta, eegoshiduru l'iphe, eme ememe ta abudu okpobe iya. <sup>21</sup>?Denu g'onye-iche anyi, bu Ebirihamu gude buru onye pfuberekoto l'iphu Chileke? O shi l'iphe, o meru; kele o gude Ayizaku, bu nwa iya je egbugbu ge ya gude gweeru Chileke ngweja

l'oru-ngweja. <sup>22</sup>?Tì hụmaduru g'ekweta iya yee iphe, o meru dagbaru? Iphe, o meru goshiru lekmeta iya dzuru edzudzu. <sup>23</sup>Iphe, e deru l'ekwo-opfu Chileke mee g'e pfuru iya; kele o sūru: “Ébirihamu kweru ke Chileke; o gūaru iya ya l'apfubekoto”; teme o gūa ya eguru ònyà iya. <sup>24</sup>Unu hūma l'oo iphe, nemadzu eme be e gude agū iya l'onye pfuberekoto; o tō būdu-a ekweta kpurumu.

<sup>25</sup>Nokwapho ge nwanyi ovuoba-a, bu Réhabu-a du. Oo iphe, o meru be o gude buru onye pfuberekoto; kele o kweru ge ndu Jiu, e ziru ozi bata ibe iya; bya eyeru phe aka; ephe shia uzo ozo laa.

<sup>26</sup>Kele oo g'anū-ēhu, unme adudu nwuhuru anwuhu-a bu g'ekweta, egoshiduru l'iphe, eeme ememe nwuhuru.

### Ire bu ogu

**3** <sup>1</sup>Unwunna mu; unu ta adukwa igwe buru ndu ezije iphe; kele unu maru l'anyiibe ndu ezije iphe be Chileke a-ka ekpeshi ikpe ike. <sup>2</sup>G'anyi ha etsosweje iphe, du igwerigwe. O kwa onye opfu teke edeswe bu onye duebe ree. O buru egube onye ono adujekwapho ike sede onwiya. <sup>3</sup>Anyi -woru mkpurukpu-igwe-inya kobe inya l'onu g'o meje iphe, anyi sūru g'o mee be anyi emeje inya l'ophu; looshi aka anyi sūru g'o shia. <sup>4</sup>Ozokwapho ugbo-mini; ?I hūmaru g'o habe shii; teme o buru oke pherephere anoduje akpo iya; ole oo nwa gberere eku ugbo be eegudeje anga iya looshi iphe, bukpo aka onye-ishi ugbo anga iya eshi. <sup>5</sup>Nokwapho g'ire bu nwiphe nshii; ole ootuje onwiya epha le ya erenuka ire.

?Tì hūmaduru g'oswa habe shii? ole akpuru oku lanu etsuje obote-egu. <sup>6</sup>Su-a; ire bu akpuru oku. Ire no-chiru enya iphe, bukpo ejo-iphe, no le mgboko-a l'ehu anyi. Ire epfurwuje ogwehu nemadzu mgburugburu; teme o nodu alotaje oku-ali-maa tsobe le ndzu nemadzu; lootsua ya tsufu; ooshiepho teke a nwuru onye ono; tsua jasū g'oo-no-beru. <sup>7</sup>O tō dudu egube anu-egbudu; ozoo enu; ozoo iphe, akpu akpukpu; ozoo iphe, bu le mini, nemadzu ata agotajedu agota; looburu l'unuphu; ophu o dudu ophu a gotaadaru; o buru l'unuphu. <sup>8</sup>Obenu lire ta adudu amadu sūru iya agota; o bu ejo-iphe, e te gudeshijedu egudeshi. O du g'érú ejo agwo, te edodu onye o taru edodo. <sup>9</sup>O bu iya be anyi gude aja onye ono, bu Nna bya buru Nnajiuphu ono; ole o buhukwa iya pho be anyi gude atu nwibe anyi onu; mbukwa onye e meru; o du ge Chileke. <sup>10</sup>O buru onu lanu ono be ago onu yee atu onu shi. Unwunna mu; o tō gbaduru g'o du egube ono. <sup>11</sup>O tō dudu nggele, asofutaje mini, atso ilu bya asofutajekwapho mini, atso utso mgbo lanu. <sup>12</sup>Unwunna mu! Oshi figu ta amijekwa akpuru olivu. Ophu vayinu amijekwa akpuru figu. Nokwapho g'e te ekutadu mini, atso utso l'umaswi.

### Mmamiphe, shi l'igwe

<sup>13</sup>?O duru onye ari le ya maru iphe; nweru uche g'unu ha? Onye ono goshiashikwa iya l'eme umere oma; waa l'eme gelee ophu shi le

mmamiphe. <sup>14</sup>Teke ọ bukwanu l'unu eji iji-ẹnya, atso-ilu bya aburu ndu akpa ẹnya; unu te ejekwa etu onwunu epha ke mmamiphe ono; kele ọo ọka be unu gude emebyi ọkpobe-opfu. <sup>15</sup>Egube mmamiphe ono te eshikwa l'igwe. O shi l'eka ndiphe. O to shidu l'eka Unme Chileke. O shi l'eka Nsetanu. <sup>16</sup>Kele eka iji-ẹnya yee akpa ẹnya du be mkpaka dukwapho; ọphu ọ dudu egube ejo-iphe, adudu iya nu. <sup>17</sup>Obenu le mmamiphe ọphu shi l'igwe duebe ree; bya aburu nchi-adu-doo; bya eme gelee; bya eme onu-utso; bya aphu obu-imemini; bya ami ọkpobe mebyi; ọphu ọokpochadu mkpocha; ọphu ọ budu tuko l'ehu-atuko-l'obu. <sup>18</sup>Te mebyi, ndu eme ge nchi du doo amije bu apfubekoto.

### Eshita ndiphe ọnyà

**4** <sup>1</sup>?Bu awe be abaphe mba yee esephe opfu ono shigbaa unu? ?Tobu-du eka o shigbaa unu bu l'iphe, ekpiri iya du unu? ?Tobudu iya bu iphe, bu ọgu, du l'ehu unu? <sup>2</sup>Qobujeru iphe, agu unu erwuduru unu eka; unu egude k'iphe ono gbuaharu ọchi. Unu -chabe ẹnya l'iphe onye ọzo; ọphu ọ dudu; unu abaahaa mba; seahaa opfu. Unu ta ahumaduru ọzo iphe, agu unu; kele unu ta asuduru g'a nu iya unu. <sup>3</sup>Unu nodu asuje g'a nu unu iphe; a ta nudu iya unu; opfu l'unu egudeje oriri, adudu ree epfu iya gee-shi g'unu egude iya mee iphe, agu unu egu. <sup>4</sup>Unube unwanyi me unwoke, eri ogori ono; ?unu ta amadu l'onye yee iphe-utso, du le mgbo-ko-a eshi ọnyà buwaa onye ọhogu Chileke? Ọo ya bu l'ọ to dudu m'obeta ọ buru onye du idagha hataru g'ephe le ndiphe shiru ọnyà; onye ono emekwa onwiya onye ọhogu Chileke. <sup>5</sup>To ?o du unu g'iphe, e deru l'ekwo-opfu Chileke bu ke mmanu, suru le "Chileke eko okophoo unme ono, o yeru g'o buru l'ime anyi ono?" <sup>6</sup>Ọle eze-iphe-oma ke Chileke ka shii. Noo iphe, e deru l'ekwo-opfu Chileke su: "Chileke apfuchijekwa ndu ngganga ọzo. Ọ nodu emejeru eze-iphe-oma nu ndu wozeru onwophe ali."

<sup>7</sup>Ọo ya bu; unu nodu Chileke l'eka. Unu apfu-chia Obutuswe ọzo; huma l'oo-gbaru unu oso. <sup>8</sup>Unu kpitaru Chileke ntse; huma l'oo-kpitarakwarupho unu ntse. Unu kwoo onwunu eka unube ndu eme iphe-eji. Unu sachaa obu unu ree unube ndu abo obu ebo. <sup>9</sup>G'o rwua unu l'ehu; g'aphu ji unu obu; unu kwashia ẹnya-mini. G'achi ọchi buru unu aphu; gemere-me buru unu iphere. <sup>10</sup>Unu wozeje onwunu ali l'iphu Chileke g'ookulia unu eli.

### Anma okwa epfurwushi nwanna onye

<sup>11</sup>Unwunna mu; unu te epfurwushijekwa nwibe unu. Onye epfurwushi nwanna iya; ọzoo onye anma nwanna iya ikpe be epfubyikwa ekemu; teme ọ buru ekemu be ọ gbẹ ekpe ikpe. Obenu le teke iikpe ekemu ikpe be i ti meekwa iphe, ekemu pfuru. Ọ kwa onye-ikpe be i bu. <sup>12</sup>Onye lanu kpurumu bu onye atuje ekemu; teme ọ buru iya bu onye-ikpe; mbu onye

ono, aduje ike dzoo ndzu; dukwapho ike gbua nemadzū. Obenu ?bū onye b'i dobesu l'i bū gūbe onye ono, anma nwibe ngu ikpe?

### Anma okwa etu onwonye epha

<sup>13</sup>Unu ngaberu mu nchi; unubē ndu sūru “Ntanū-a; ozo echele bē o dūru mkpūkpu, anyi e-je je anogba apha; gbaa ngho rita urwu;” <sup>14</sup>l'ēbe abū l'unu maru g'echele a-dū. ?Ndzū unu bū gūnu? O bū ɛnwuru-oku, akpū-lihuje; a nɔkwapho nwanshii l'oophukashihu. <sup>15</sup>Noo iphe, unu gege asūje-chia: “O -dū Chileke l'uche bē anyi a-tūko nōdu ndzū; mee owa-a; ozo ophuu.” <sup>16</sup>Obe l'owa bē unu etse etsetse bya etu onwunu epha. Egu-be ekuku ono g'ō hakōta dukwa eji.

<sup>17</sup>Oo ya bū l'onye maru ree, o gege eme; ophu o meduru iya bē o bū-kwa onye obu eme iphe-eji.

### Anmaru ndu nweru iphe okwa

**5** <sup>1</sup>Nta-a bū k'unubē ndu nweru iphe; unu kwashia ɛnya-mini; chia mkpu ejo-aphū, abyarū unu. <sup>2</sup>Ēku unu reshihuchaakwaru ereshihu. Teme ŋgwá unu būru iphe, nsū sukashichawaru. <sup>3</sup>Mkpōla-ododo unu mē kē mkpō-la-ochaa unu gbaakwaru eḡba. Oo eḡba iya ono a-pfuru agba unu ekebe. Oo-kepyashi anū-ɛhu unu g'oku. Nta-a bē unu kparū ɛku kuberu onwunu l'ikpazū-a. <sup>4</sup>Ndu jeru unu ozi ɛgu bē unu ta apfuduru ugwo; aphū, epe agū bē erwuakwa l'igwe. Teme mkpu kē ndu kpatarū unu iphe, unu kōru l'opfu rwuakwapho nchi Chipfu, bū Okalibe-Kakōta-ike ono. <sup>5</sup>Unu buru lē mgbo-ko; tūsarū ɛhu; eri gwōogwo; eme ɛhu unu ɛhu unu. Unu tsua onwunu ɛbà g'anū-ɛbà kwaberu mboku egbugbu unu. <sup>6</sup>Unu nmarū ndu pfuberekoto ikpe; gbua phe; l'ēbe abū l'ō dūru iphe, epe akpōshijehawaa unu ememe.

### Ata nshi waa epfu anū Chileke

<sup>7</sup>Unwunna mu; unu takpōkwapho nshi nōdu jasū teke Nnajiuphu a-bya. Unu hūmaru g'onye kōru opfu atajē nshi; kwaberu opfu iya g'o rwuta iphe, barū urwu. Ootaje nshi; igwe eshi l'awuze dzee mini dzekōta iya udzumini; l'ootaa nshi jasū l'ephefuta. <sup>8</sup>Unubēdua kwapho; unu takwapho nshi; shihu obu ike; kele teke Nnajiuphu a-bya dukwaa ntse.

<sup>9</sup>Unwunna mu; unu ta agujekwaru nwibe unu aphū g'eete ekpedu unu ikpe. Unu lekwa onye-ikpe g'oopfuru l'ōnu mgbo! <sup>10</sup>Unwunna mu; unu nyatajekpoepo ndu shi epfuchijeru Nnajiuphu. Unu gudeje phe nwua ota-nshi teke unu eje iphe-ɛhuka. <sup>11</sup>Unu eleanaa; o kwa ndu tarū nshi bē anyi ekuje ndu a gōru ɛhu-ūtso nū. Unu nūmawaru atanshi kē Jiobu. Unu makwarupho iphe, Nnajiuphu nūru iya l'ikpazū. Kele Nnajiuphu bū onye obu-imemini bya abūru o-gba-mkpu.

<sup>12</sup>Ole ophu kachakpōonu; unwunna mu bū; unu te erijekwa angū. Unu te egudejekwa igwe ozo alī ria angū; ophu o dukwa iphe ozo unu

e-gudeje ria angu. Unu -su “ee” g’o buru ee; teke unu suru “waawaa” g’o buru waawaa; g’a ta anma unu ikpe iya.

<sup>13</sup>?O duru g’unu ha onye eje iphe-ehuka? G’onye ono pfuru nu Chileke. ?O duru onye ehu atso? G’onye ono gua ebvu ajaja! <sup>14</sup>?O duru g’unu ha onye iphe eme? G’onye ono kukoo ndu e meru ogerenya Chiochi g’ephe pfuru opfu ehu iya nu Chileke. Ephe egude epha Nnajiuphu wua ya manu l’ishi. <sup>15</sup>Opfu, e pfuru nu Chileke bya ekweta l’oo-mee be a-dzota onye iphe eme; Nnajiuphu abya emee; l’o wekorohu. Teke o bu l’oo iphe-eji be o meru; a guaru iya ya nvu. <sup>16</sup>Noo ya bu; unu koshijeru nwibe unu iphe-eji unu; teme unu epfukwapho anuru nwibe unu Chileke g’ee-me g’unu wekorohu. Opfu, onye pfuberekoto pfuru nu Chileke be ike dukwa l’ere ire.

<sup>17</sup>Elayijia bu nemadzu mmanu g’anyi bu. O pfuru nu Chileke pfushia ya ike su g’igwe buchia mini. O noo mgbarapha eto l’onwa ishii; ophu mini atadaduru l’ali. <sup>18</sup>O bya epfuru nu Chileke ozo; igwe bya mini. Iphe, a kuru l’ali miahaa mebyi ozo.

<sup>19</sup>Unwunna mu; o -duru g’unu ha onye shisweru uzo l’okpobe-opfu ono; onye ozo duphuta iya azu l’uzo, pfuru oto; <sup>20</sup>g’onye ono maru l’onye duphutaru onye eme iphe-eji azu; mbu onye l’eshi uzo, gberu nggo; onye ono be dzotaru nemadzu l’eka onwu; teme o meakwarupho; a guaru iya nvu l’ikpoto iphe-eji.